



## SIARAN MEDIA

### **PELAN STRATEGIK PERNIAGAAN SME CORP. MALAYSIA (2022 – 2030) AKAN MENGUKUHKAN HALA TUJU KORPORAT AGENSI BAGI PEMBANGUNAN PMKS PASCA COVID-19**

---

**Kuala Lumpur, 27 September 2022** - SME Corp. Malaysia, salah sebuah agensi di bawah Kementerian Pembangunan Usahawan dan Koperasi (KUSKOP), telah mengeluarkan Pelan Strategik Perniagaan SME Corp. Malaysia (2022 – 2030) yang menetapkan hala tuju strategik korporat SME Corp. Malaysia untuk tempoh sembilan (9) tahun pada hari ini. Strategi korporat yang dibangunkan adalah selaras dan menyokong Dasar Keusahawanan Negara 2030 (DKN 2030), Wawasan Kemakmuran Bersama 2030 (WKB 2030) dan Rancangan Malaysia Kedua Belas (RMKe-12).

Bertemakan 'Merintis Transformasi Perniagaan', Pelan ini digubal bagi membantu SME Corp. Malaysia dalam usahanya memangkin transformasi PMKS ke arah mencapai kemampanan dan lonjakan pertumbuhan perniagaan. Berpandukan strategi jangka panjang, ia berdasarkan pelan asas usaha yang terselaras, sistematik dan kolektif bagi mewujudkan lebih banyak PMKS dalam rantaian bekalan domestik dan global serta perusahaan mikro yang berdaya maju.

Menurut YBhg. Dato' Suriani Binti Dato' Ahmad, Ketua Setiausaha Kementerian Pembangunan Usahawan dan Koperasi (KUSKOP), "Dokumen penting ini dihasilkan tepat pada masanya, dan saya yakin ianya akan memberi gambaran jelas hala tuju strategik bagi agensi ini melaksanakan strategi dan programnya dengan berkesan dan cekap, ke arah mencapai matlamat organisasi secara optimum dalam mempercepatkan lagi pembangunan PMKS di seluruh negara".

Lima (5) bidang tumpuan telah digariskan sebagai fokus strategi jangka masa panjang SME Corp. Malaysia berdasarkan keadaan ekonomi semasa dan megatrend yang akan mempengaruhi dunia perniagaan. Penekanan akan diberikan dalam

meningkatkan rantai nilai dalam industri berimpak tinggi, pengantarabangsaan PMKS, pendigitalan dan automasi dengan pendekatan berstruktur dan pembangunan perusahaan mikro yang berpotensi tinggi. Kerjasama dengan pelbagai Kementerian, Agensi dan kumpulan industri akan diteruskan bagi membolehkan SME Corp. Malaysia berfungsi dengan lebih cekap sebagai pusat rujukan utama untuk PMKS, sekaligus mengukuhkan peranan SME Corp. Malaysia sebagai Agensi Penyelaras Pusat PMKS di Malaysia

Encik Rizal bin Nainy, Ketua Pegawai Eksekutif turut menekankan bahawa, “Elemen penting yang diketengahkan adalah pandangan jauh mengenai pembangunan PMKS dalam tempoh sembilan (9) tahun akan datang, yang memberi tumpuan pada masa depan PMKS pasca COVID-19, serta trend baharu, teknologi masa depan dan amalan terbaik yang dijangka mempengaruhi pembangunan PMKS. Dengan adanya elemen pandangan jauh, program dan aktiviti yang dilaksanakan akan terselaraskan dan memenuhi keperluan PMKS bagi jangka masa pendek, sederhana dan panjang”

Pelan Strategik SME Corp. Malaysia (2022 – 2030) ini telah dikeluarkan semasa “Sesi Jaringan Usahawan: Bila Wanita Berbicara...” yang dianjurkan oleh SME Corp. Malaysia. Sesi Jaringan Usahawan ini, yang disempurnakan oleh YBhg. Dato’ Suriani Binti Dato’ Ahmad, Ketua Setiausaha KUSKOP, memberi peluang kepada usahawan wanita berkongsi pandangan dan idea untuk memajukan perniagaan dan meluaskan jaringan perniagaan.

Sesi ini turut dihadiri oleh Ketua Pegawai Eksekutif SME Corp. Malaysia, YBrs. Encik Rizal bin Nainy dan YBhg. Dato’ Hajah Faridah binti Ab. Jabbar yang merupakan Anggota Perbadanan SME Corp. Malaysia.

Untuk maklumat lanjut mengenai program serta inisiatif di bawah SME Corp. Malaysia, sila layari <https://www.smeCorp.gov.my/> atau hubungi 1300 30 6000.

- TAMAT –

## **Tentang SME Corp. Malaysia**

SME Corp. Malaysia merupakan sebuah Agensi Penyelaras Pusat di bawah Kementerian Pembangunan Usahawan dan Koperasi (KUSKOP) yang berperanan sebagai pusat pengumpulan dan rujukan setempat bagi maklumat dan khidmat nasihat Perusahaan Kecil dan Sederhana (PKS), penyelaras program pembangunan PKS, penilaian ekonomi serta pengakreditasi PKS, pembangunan perniagaan dan program sokongan, dan juga fasilitasi akses PKS kepada pasaran dalam dan luar negara.

Bermula pada 2 Mei 1996, SME Corp. Malaysia dahulunya dikenali sebagai Perbadanan Pembangunan Industri Kecil dan Sederhana (SMIDEC), bermatlamat membangunkan Industri Kecil dan Sederhana (IKS) Malaysia yang berkeupayaan dan berdaya tahan agar mampu berdaya saing di pasaran global. Pada tahun 2007, SMIDEC telah diberi mandat oleh Majlis Pembangunan PKS Kebangsaan yang dipengerusikan oleh YAB Perdana Menteri untuk menggubal dasar dan strategi menyeluruh bagi PKS dan memacu program PKS merentasi Kementerian dan Agensi. Sehubungan itu, SMIDEC telah dijenamakan semula secara rasmi sebagai SME Corp. Malaysia pada 2 Oktober 2009.

### **PERBADANAN PERUSAHAAN KECIL DAN SEDERHANA MALAYSIA (SME CORP. MALAYSIA)**

Tingkat 6, Blok B, Platinum Sentral  
Jalan Stesen Sentral 2  
Kuala Lumpur Sentral  
50470 Kuala Lumpur  
Tel : 1300-30-6000  
Faks : 603-2775 6001  
E-mail : [info@smecorp.gov.my](mailto:info@smecorp.gov.my)  
Laman web: [www.smecorp.gov.my](http://www.smecorp.gov.my)

#### **Pengarah**

**Bahagian Komunikasi Strategik**

**(U.P.: Pn. Raja Rozaila bt Raja Azman)**

**Tel : 03-27756203 atau 016-3322121**

**Email : [rozaila@smecorp.gov.my](mailto:rozaila@smecorp.gov.my)**